

Na osnovu čl. 24. i 37. Zakona o izvršavanju Budžeta Federacije Bosne i Hercegovine za 2021. godinu („Službene novine Federacije BiH“, broj: 4/21), Vlada Federacije Bosne i Hercegovine, na 267. sjednici, održanoj 27.05.2021. godine, donosi

ODLUKU

O USVAJANJU PROGRAMA UTROŠKA SREDSTAVA UTVRĐENIH U RAZDJELU 17. BUDŽETA FEDERACIJE BOSNE I HERCEGOVINE ZA 2021. GODINU FEDERALNOM MINISTARSTVU ENERGIJE RUDARSTVA I INDUSTRIJE „TEKUĆI TRANSFERI I DRUGI TEKUĆI RASHODI-SUBVENCIJE PRIVATNIM PREDUZEĆIMA I PODUZETNICIMA-REGRESIRANJE KAMATA-GARANTNI FOND“

I.

Usvaja se Program utroška sredstava utvrđenih u razdjelu 17. Budžeta Federacije Bosne i Hercegovine za 2021. godinu Federalnom ministarstvu energije, rudarstva i industrije „Tekući transferi i drugi tekući rashodi - Subvencije privatnim preduzećima i poduzetnicima - Regresiranje kamata - Garantni fond“ u iznosu od 6.000.000,00 KM (u daljem tekstu: Program).

II.

Program iz stava (1) ove tačke nalazi se u prilogu ove odluke i čini njen sastavni dio.

III.

Federalno ministarstvo energije, rudarstva i industrije dostavljat će izvještaje Federalnom ministarstvu finansija/financija i Vladi Federacije Bosne i Hercegovine u skladu sa Zakonom o izvršavanju Budžeta Federacije Bosne i Hercegovine za 2021. godinu („Službene novine Federacije BiH“, broj: 4/21) i Programom iz tačke I. ove odluke.

IV.

Za realizaciju ove odluke zadužuju se Federalno ministarstvo energije, rudarstva i industrije, Federalno ministarstvo finansija/financija i Razvojna banka Federacije Bosne i Hercegovine, svako u okviru svoje nadležnosti.

V.

Ova odluka stupa na snagu narednog dana od dana objavljivanja u „Službenim novinama Federacije BiH“.

V. broj: 904 /2021
27.05.2021. godine
Sarajevo



PREMIJER

Fadil Novalić

Bosna i Hercegovina
Federacija Bosne i Hercegovine
Federalno ministarstvo energije, rudarstva i industrije
Mostar

**PROGRAM UTROŠKA SREDSTAVA UTVRĐENIH U RAZDJELU 17.
BUDŽETA FEDERACIJE BOSNE I HERCEGOVINE ZA 2021. GODINU
FEDERALNOM MINISTARSTVU ENERGIJE, RUDARSTVA I
INDUSTRIJE, „TEKUĆI TRANSFERI I DRUGI TEKUĆI RASHODI-
SUBVENCije PRIVATNIM PREDUZEĆIMA I PODUZETNICIMA-
REGRESIRANJE KAMATA-GARANTNI FOND“**

Mostar, 2021. godine

I. UVOD

Programom utroška sredstava utvrđenih u razdjelu 17. Budžeta Federacije Bosne i Hercegovine za 2021. godinu Federalnom ministarstvu energije, rudarstva i industrije „Tekući transferi i drugi tekući rashodi – Subvencije privatnim preduzećima i poduzetnicima – Regresiranje kamata – Garantni fond“ (u daljem tekstu: Program), definišu se zakonodavni okvir, cilj, namjena sredstava, korisnici Programa, raspoloživa sredstva, trajanje Programa, visina subvencionirane kamatne stope, uslove koje treba ispuniti korisnik, kao i postupak odobravanja sredstava. Ovaj Program je rezultat nastojanja Vlade Federacije Bosne i Hercegovine za nastavak iznalaženja mjera pomoći privredi Federacije Bosne i Hercegovine, usljed poteškoća u poslovanju privrednih društava.

Sredstva za provođenje i realizaciju Programa su obezbijeđena u Budžetu Federacije Bosne i Hercegovine za 2021. godinu.

II. ZAKONODAVNI OKVIR

- Zakon o Vladi Federacije Bosne i Hercegovine („Službene novine Federacije BiH“, br. 1/94, 8/95, 58/02, 19/03, 2/06 i 8/06);
- Uredba o načinu finansiranja i upravljanja Garancijskim fondom („Službene novine Federacije Bosne i Hercegovine“, broj 44/20);
- Budžet Federacije Bosne i Hercegovine za 2021. godinu („Službene novine Federacije Bosne i Hercegovine“, broj 4/21);
- Zakon o izvršavanju Budžeta Federacije Bosne i Hercegovine za 2021. godinu („Službene novine Federacije Bosne i Hercegovine“, broj 4/21);

III. CILJ PROGRAMA

Osnovni cilj Programa je omogućiti korisnicima koji su kreditno zaduženi po Kreditno garantnom programu za velika preduzeća („Službene novine Federacije Bosne i Hercegovine“, broj 65/20) i Kreditno garantnom programu za izvoznike („Službene novine Federacije Bosne i Hercegovine“, broj 65/20), kao i za kreditno garantne programe koji će biti objavljeni u 2021. godini, da dobiju grant sredstva na ime subvencionisanja dijela troškova kamate. Subvencionisati će se dio kamata na naprijed navedene kredite, na tromjesečnom nivou, u visini do 2,5%.

IV. NAMJENA SREDSTAVA PROGRAMA

Postupak subvencionisanja dijela kamate će se provoditi na način da će se vršiti refundiranje dijela kamate na kredite odobrene za naprijed navedene programe za održavanje tekuće likvidnosti i postojećeg stepena zaposlenosti, obrtnih sredstava, dovršenja već započetih investicija, kao i pokretanje novih poslovnih aktivnosti i rast i razvoj postojećih, povećanje konkurentnosti, razvoj i uvođenje inovacija, novog

zapošljavanja, kupovinu zemljišta i poslovnih prostora, kupovinu poslovnih udjela, refinansiranje postojećih kreditnih obaveza i obaveza po osnovu finansijskog lizinga.

V. KORISNICI PROGRAMA

Pravo na dodjelu grant sredstava po ovom Programu ostvaruju privredna društva koja su kreditno zadužena po postojećim programima za velika preduzeća i izvoznike („Službene novine Federacije Bosne i Hercegovine“, broj 65/20) ili će biti zadužena u narednom periodu u okviru Kreditno garantnog programa za velika preduzeća i Kreditno garantnog programa za izvoznike u 2021. godini.

VI. RASPOLOŽIVA SREDSTVA

Ukupan iznos sredstava namijenjenih za subvencionisanje dijela kamate po ovom Programu je 6.000.000,00 KM, koji je osiguran Budžetom Federacije Bosne i Hercegovine za 2021. godinu i nalazi se na razdjelu 17., ekonomski kod 6145 – Subvencije privatnim preduzećima i poduzetnicima – Regresiranje kamata – Garantni fond.

Subvencije će se odobravati korisnicima kreditnih sredstava do kraja fiskalne godine, odnosno do 31.12.2021. godine.

VII. PROCEDURA ODOBRENJA SUBVENCije

Pravo na regresiranje kamata imaju sva privredna društva koja su korisnici kredita po kreditno garantnim programima za velika preduzeća i izvoznike za 2020. godinu, kao i budući korisnici kredita po programima za 2021. godinu. Federalno ministarstvo energije, rudarstva i industrije neće raspisivati javni poziv po ovom Programu, obzirom da će korisnici sredstava garancijskog fonda po automatizmu dobiti mogućnost korištenja sredstva za regresiranje kamata. Po ovom Programu, korisnici kredita stižu pravo na regresiranje kamata za II., III. i IV. kvartal 2021. godine, ukoliko su uredno izmirili dosadašnje obaveze po kreditu.

Nakon što Razvojna banka Federacije Bosne i Hercegovine obezbijedi dokaz od komercijalne banke da je korisnik kredita uredno otplatio na kvartalnoj osnovi anuitete kredita (u skladu sa pravilima bankarskog poslovanja), izvršit će obračun iznosa kamate koji je predmet regresiranja, te u roku od 7 dana od dana zaprimanja dokaza od komercijalne banke o uredno otplaćenim ratama kredita za obračunsko razdoblje, dostaviti Federalnom ministarstvu energije, rudarstva i industrije obavijest o kvartalnom iznosu potrebnih novčanih sredstava za regresiranje kamata za svakog korisnika, sa potrebnim podacima o korisniku za uplatu novčanih sredstava na njegov račun. Federalno ministarstvo energije rudarstva i industrije će dati nalog Trezoru Federacije Bosne i Hercegovine za prenos sredstava na račun korisnika, u cilju refundiranja kamata, u roku od 7 dana od dana zaprimanja obavijesti.

Razvojna banka Federacije Bosne i Hercegovine i Federalno ministarstvo energije, rudarstva i industrije definisati će međusobne odnose ugovorom o realizaciji aktivnosti regresiranja kamata-Garantni fond, kojim će biti definisana detaljna procedura vršenja subvencioniranja kamata.

VIII. OBJAVLJIVANJE AKTA

Ministarstvo će ovaj Program i Odluku o usvajanju Programa objaviti u „Službenim novinama Federacije BiH“ i na web stranici Ministarstva: www.fmeri.gov.ba.

MINISTAR

Nermin Džindić